

Saturday, February 15, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

GINGER AUCTION

Chief Minister Pu Lalduhoma'n tun thla february ni 20 atangin Secondary Collection Centre (SCC) cum Auction Centres ah Sawhthing hralhchhuah runpui tan a ni dawn tih a sawi.

He thu hi Instagram kaltlanga tarlangin Chief Minister chuan sawhthing a sumdawngte tel vek turin an sawm a ti a, auction chu cheng 50 atanga tan tur ani tih sawiin District Agricultural Marketing Committee (DAMC) te leh Coordinator bakah SCC a duty ten a tul angin an buaipui dawn tih a sawi bawk.

Kumin February ni 20 atanga sawhthing lei tan tur chungchang hi Agriculture Minister Pu PC Vanlalruata'n January thlaa chanchinbumite a kawmnaah a lo sawi tawh a, Minister chuan sorkarin Agricultural Market Assurance Schemes hnuaia sorkarin rate tur a tihchhuah tawh angin sawhthing chu kg-ah cheng 50 a lei a ni dawn a ti a. Mizoram puma khaw hrang hrangah society 675 a awm tawh thu sawiin heng society te hian district hrang hranga sorkarin a ruahman sawhthing lak khawma leina tur, secondary collection centre 54-ah an phurhkhawm dawn tih sawiin District tina District Agriculture Marketing Committee in an lo buaipui dawn a ti bawk.

Minister chuan sawhthing chu India ram hmun hrang hrangah an thar nasat thu sawiin a bik takin India ram chhim lamah an thar nasat thu a sawi a. Sorkarin kuthnathawktute chu sawhthing an lei tan hun tura ruahman, thla thar ni 20 chu nghak hram turin an ngen a ti a, thlai dangah pawh hmalak mek a nih thu a sawi bawk.



ASSEMBLY

Tun thla ni 19 atanga tan tur Assembly inkhawm (budget session) atan starred question 740 lehziaka chhan chi (unstarred question) 88 a lut tawh.

Assembly secretariat atanga thu dawn danin zawhna hi sorkar atangin dan siam tura duan pathum a lut tawh a, heng te hi Labour, Employment, Skill Development and Entrepreneurship Department, Urban Development & Poverty Alleviation Department leh Finance atangin a ni a, heng bakah hian Official Resolution pakhat leh Resolution 85 a lut tawh a, Paper lay tur 5 a lut tawh bawk.

March ni 20 thleng assembly thutkhawm awm turah hian ni 14 chhung an thukhawm dawn a, February thla ah vawi 2 thu in March thla ah vawi 12 an thu dawn a, Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.

Tun tum assembly inkhawmah hian March ni 4 ah finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh dawn a ni.



MTKP

Mizoram Thalai Kristian Pawl (MTKP) inkhawmpui vawi 48-na chu ningani atang bultan chu Lunglawn mual, Lunglei-ah neih mek a ni a, naktuk Pathianni zanah a tiak ang.

Mizoram Thalai Kristian Pawl Secretary Rev F. Zorinkhuma'n Akashvani News a hrilh danin MTKP inkhawmpui vawi 48-na ah hian Lunglei khaw pawn atanga riak lut tura in report sang 6 dawn ani a ti a, heng bakah hian Khualtha Mizoram pawn atangin kal 30 chuang an awm tih sawiin Mizoram chhunga Kohhran dang Thalai pawhin palai an tir a ti a, heng bakah hian Mission Field zaipawl an tel tih a sawi bawk.

Inkhawmpui pandal “Krista Pasalthate Rûn” ah hian mi Sangriat atanga mi sangkua (8000-9000) vel leng tura ruahman a ni a, Pandal extension hi Ceilling hmanga siam niin pandal ah hian carpet phah a ni bawk.

MTKP Inkhawmpui vawi 48-na ah hian “Pathian hnaih rawh u” tih chu thupui atan thlan a ni a, a tan ni February ni 13 (Ningani) zan atangin inkhawm hi awm tanin nimin zirtawpni ah Rorel inkhawm neih a ni a, vawiin Inrinni leh Pathianni ah inkhawm a awm dawn a ni.

Mizoram Thalai Kristian Pawl (MTKP) ah hian tun dinhmunah member 50364 awmin hmeichia 19802 leh mipa 30562 an awm a, Unit 447 awmin Bial 92 an awm mek a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



MIZUAA PRESS CONFERENCE

Mizoram University Alumni Association (MIZUAA) President Dr Henry Zodinliana Pachuau chuan Mizoram University chu Mizorama zirna in lian ber leh rampum huapa tha ber pawl a nih avangin Mizo mipuiten a chungchang ngaihven tam a pawimawh tih a sawi.

Vawiina Mizoram University zirlai hlui intelkhawm MIZUAA in Aizawl Press Club-a chanchinbumite an kawmnaah he thu hi sawiin MIZUAA President chuan University that zawng endikna, NAAC Peer visit chu thla thar ni 4 atanga ni 6 ah MZU in a hmachhawn leh dawn tih a sawi a. Hetah hian MZU laka mipuiten ngaihndan tha an neih a pawimawh hle a ni a ti a. NAAC Accreditation chu kum 5 dana neih thin a nih thu leh, India rama zirna insang tehnaah chuan a pawimawh ber a nih avangin kawng hrang hrang a that a ngai tih a sawi a. Tunah hian kum 2014-2018 chhungin ‘A’ grade a nih mek thu leh, A grade emaw a chunglam ni turin an inbuatsaih chhoh mek thu a sawi a. Kumin atangin MZU-a lut tur ten CUET an hmachhawn zel a ngaih tawh dawn thu a sawi bawh a ni.

MIZUAA President chuan an pawl din tirh atangin hmalakna neuh neuh a awm chho zel tih a sawi a. Programme hrang hrang huaihawt thin a nih thu leh, nikum atang khan member te kohkhawm hna an thawh chhoh thu a sawi a. Vawiina chanchibumite an kawm pawh an pawl a in register lo, sing tel la awm te an kohkhawmna a nih thu a sawi bawh.

